

大明會典

大明會典卷之一百三十四

兵部十七

營操

國初設京營。隸大元帥府。後改五軍都督府。以訓練在京官軍。永樂間遷都。又於中都大寧山東河南附近衛所。摘撥官軍輪班上操。以內衛京師。外備征伐。名曰三大營。景泰三年。分為十營。成化三年。分為十二團營。正德六年。更為東西兩官廳。嘉靖二十九年。復三營制。名曰京營。其建置沿革并事例。備開於後。禁衛諸營亦以類附見。

京營

舊三大營制 永樂中定

國初立大小教場以練五軍將士。永樂初既有五軍營。又有三千營以司寶彝令旗神機營以司神鎗火器。名曰三大營。管操官曰提督。各哨分管官曰坐營。曰坐司。俱兵部奏請於公侯伯都督都指揮內推選。後兼用內臣。神機火器特令監之。曰監鎗。又有掌號把總把司把牌等官。俱於都指揮指揮內推選。

五軍營提督內臣一員。武臣二員。掌號頭官二

員

大營坐營官一員把總二員

中軍坐營官一員馬步隊把總各二員

左掖

右掖

左哨

右哨官俱同

管操練京衛及中都留守司山東河南太

寧三都司各衛輪班馬步官軍

千二營把總二員

管隨

駕擺列馬隊官軍

圍子手坐營官一員。一司。二司。三司。四司。各把總二員

管操練上直义刀手及京衛步隊官軍

幼官舍人營坐營官一員。幼官營把總一員。舍人營。一司。二司。三司。四司。各把總一員

管操練京衛幼官及應襲舍人

殫忠効義營坐營官一員。把總各一員

管操練京衛報効舍人餘丁。舍人營。曰

忠餘丁營曰効義

三千營提督內臣二員武臣二員掌號頭官二員坐司官五員見操把總三十四員上直把總十六員明甲把總四員

一司

管執

大駕龍旗寶纛勇字旗員

御寶及兵仗局什物等件上直官軍

一司

管左右二十隊勇字旗

大駕旗纛金鼓等件。上直官軍

一司

管傳令營

令旗令牌。

御用監盔甲。

尚冠尚衣。尚履。什物等件。上直官軍

一司

管執

大駕勇字旗。五軍紅盔貼直官軍。上直官軍

一司

管紱虎手。

馬橋及前哨馬營。且明甲官軍隨侍管隨侍。

東官官舍遼東備禦回還官軍。

神機營提督內臣二員。武臣二員。掌號頭官二員。

中軍坐營內臣一員。武臣一員。其下分為四司。各監鎗內臣一員。把司官一員。把牌官二員。

左掖坐營內臣一員。武臣一員。其下分為三司。各監鎗內臣一員。把司官一員。把牌官二員。

員

右掖坐管內臣一員。武臣一員。其下分為三司。各監鎗內臣一員。把司官一員。把牌官二員。

左哨坐管內臣一員。武臣一員。其下分為三司。各監鎗內臣一員。把司官一員。把牌官二員。

右哨坐管內臣一員。武臣一員。其下分為三司。各監鎗內臣一員。把司官一員。把牌官二員。

管操演神銃神砲等項大器

五千下坐營內臣一員武臣一員其下分為
四司各把司官二員

管操演大器及隨

駕護衛馬隊官軍

舊團營制

景泰初定

景泰初選大營精銳官軍分立十營團操以備
警急調用名曰團營每營官軍一萬員名其提
督及坐營掌號把總等內外官員倣三大營之
制而命本部尚書或都御史一員提督天順初

罷八年復置。成化初罷。三年復置。分為十二營。十八年以邊警。令定撥官軍聽候調用。自後又於團營選其精銳為聽征人馬。屬之東西兩官廳。

掌號官三員

奮武營坐管內臣一員。武臣一員。號頭一員。

把總二十員

所隸錦水衛。燕山右衛。府軍右衛。虎賁右衛。和陽衛。大寧前衛。

蔚州左衛

耀武營

所隸燕山左衛。前衛。武德衛。義勇右衛。忠義後衛。

練武營

所隸金吾右衛。留守右衛。應天衛。

顯武營

所隸府軍左衛。引林左衛。右衛。武功。左衛。虎賁左衛。潘陽左衛。右衛。驍騎。右衛。神策衛。興武衛。龍驤衛。

敢勇營

所隸引林前衛。留守中衛。忠義右衛。神武中衛。

果勇營

所隸旗手衛。濟陽衛。武功中衛。留守後衛。忠義前衛。

効勇營

所隸永清右衛。義勇前衛。神武左衛。

鼓勇營

所隸彭城衛。金吾前衛。後衛。府軍衛。約韜衛。神武後衛。

立威營

所隸永清左衛。府軍後衛。龍虎衛。大寧中衛。義勇後衛。

伸威營

所隸金吾左衛。濟州衛。留守前衛。鎮南衛。寬河衛。

揚威營

所隸武功右衛。府軍前衛。

振威營

所隸通州衛。大興左衛。留守左衛。高谷衛。會州衛。以上皆嘉靖初添設。

十二營內各分五軍。三千神機三營。五軍營管內外馬步官軍。三千營管內外馬隊官軍。神機營管內外步隊官軍。

今定京營制

嘉靖間定

嘉靖二十九年罷團營兩官廳。復

祖制三營。更三千營曰神樞營。其三營司哨掖等名及諸內臣俱裁革。而統以大將一員曰總督京營戎政廳。給印曰戎政之印。佐以文臣一員曰協理京營戎政。其下設副叅等官二十六員。凡團營兩官廳之兵悉歸五軍營而寶肅令旗等

項則仍隸神樞營。遇用撥取。無恒名。已又命以
新募兵四萬人。分隸神樞神機二營。其副將各
止設一員。而增能戰之將六員。分領操練。大將
所統三營之兵。平日名練勇。將用時各定職名
五軍營

大將一人

總主三營。六副將并
參將等官。俱聽節制。副將二人。左

右前。後。參將四人。遊擊將軍四人。大將統軍

一萬。二副各七千。四參各六千。四遊各三千。

外備兵六萬六千六百六十名

神樞營

即舊三千營

副將二人各統軍六千。佐擊將軍六人各兵

三千

即前大將統八千

外備兵四萬人

神機營將兵同

續定三大營將領官軍之制

三大營將領副參遊佐坐營號頭中軍千把總等官共五百八十六員

五軍管官一百九十六員

戰兵一營左副將一員

戰兵二營練勇參將一員

車兵三營參將一員

車兵四營遊擊將軍一員

城守五營佐擊將軍一員

戰兵六營右副將一員

戰兵七營練勇參將一員

車兵八營參將一員

車兵九營遊擊將軍一員

城守十營佐擊將軍一員

備兵坐營官一員

專為收新補之兵以備十營兵之缺者

大號頭官一員

以上部推

監鎗號頭官一員

中軍官十一員

隨征千總官四員

設在臺西將臺下

隨營千總官二十員

選鋒把總官八員

舊為家丁千總二員。惟戰兵營。車兵營。各一員。

把總一百三十八員

以上俱舊推

山東領班都司二員

神樞營官一百八員

戰兵一營左副將一員

戰兵二營練勇參將一員

車兵三營參將一員

車兵四營遊擊將軍一員

城守五營佐擊將軍一員

戰兵六營右副將一員

車兵七營練勇參將一員

執事八營參將一員

城守九營佐擊將軍一員

城守十營佐擊將軍一員

備兵坐營官一員

大號頭官一員

以上都推

監鎗號頭官一員

中軍官十一員

千總官二十員

選鋒把總官六員

舊為家丁千總二員

把總一百五十七員

以上俱管推

河南領班都司一員

神機管官一百八十二員

戰兵一營左副將一員

戰兵二營練勇參將一員

車兵三營遊擊將軍一員

車兵四營佐擊將軍一員

城守五營佐擊將軍一員

戰兵六營右副將一員

車兵七營練勇參將一員

城守八營佐擊將軍一員

城守九營佐擊將軍一員

城守十營佐擊將軍一員

備兵坐營官一員

大號頭官一員

以上都推

監鎗號頭官一員

中軍官十一員

千總官二十員

選鋒把總官六員

把總一百二十八員以上俱管推

中都領班署副留守四員舊都司二員

在京各衛分隸三大管制

府軍前衛 牧馬所

騰驤左衛 騰驤右衛

茂陵衛

獻陵衛 龍虎衛

蕃牧所 通州左衛

留守中衛

大寧中衛

永陵衛

留守右衛

永清左衛

神武中衛

景陵衛

羽林前衛

通州右衛

忠義前衛

龍驤衛

真靖所

康陵衛

神策衛

瀋陽左衛

瀋陽右衛

義勇前衛

以上衛勇隸五軍營

大寧前衛

富峪衛

義勇右衛

燕山左衛

羽林左衛

錦衣衛

營州前屯衛

濟陽衛

羽林右衛

大興左衛

武功中衛

虎賁左衛

武功右衛

旗手衛

密雲中屯衛

裕陵衛

神武左衛

武驤右衛

留守後衛

虎賁右衛

府軍後衛

驍騎右衛

豹韜衛

彭城衛

燕山右衛

通州衛

武驤左衛以上衛分隸神樞營

金吾左衛

應天衛

永清左衛

和陽衛

府軍右衛

義勇右衛

留守前衛

濟州衛

金吾右衛

鎮南衛

寬河衛

鷹揚衛

忠義後衛

燕山前衛

金吾前衛

府軍衛

府軍左衛

武德衛

定邊衛

蔚州左衛

興武衛

金吾後衛

會州衛

武成中衛

忠義右衛

以上衛分隸神機營

營政通例

凡督理戎政等官。景泰初年。選精兵團練。以兵部尚書或都御史領之。弘治元年。以都御史提督領。

勅行事。後以兵部尚書兼提督○嘉靖六年題准
特設都御史一員專一提督團營軍務領

勅行事○二十九年令革十二團營兩官廳易交
戎政廳仍用印信關防設京營總兵官提督三
管一員用協同提督官二員贊理軍務文臣一
員舊任提督官回府管事內侍官俱裁革以兵
部侍郎兼僉都御史贊理京營軍務領

勅行事○又令總督官名總督京營戎政不得名
總兵改贊理為協理戎政○三十一年令總督
非外出不用欽差二字革戎政廳首領官六房

據史○隆慶四年議更營制。初革總督勲臣。用
總兵官三員。各給關防。推文職大臣一員督理。
又改總兵官為提督。仍用勲臣三員。又添文臣
二員。與勲臣一同提督。又以六提督事權不一。
仍復舊制。用武臣一員總督。文臣一員協理。給
戎政印。繳三關防。○又題准。神樞神機營各添
設副將一員。五軍營革參將一員。神樞神機營
各革佐擊一員。

凡勲臣隨營。嘉靖二十六年奏准。行令巡視京
營科道通將公侯伯及都督等官嚴加考覈。參

舉以憑從公推用○三十一年奏准公侯伯年
二十以上者不拘見任帶俸俱送本部酌量選
用。定以協贊名色分撥各管副參遊位等官協
同入營觀操。如遇將官調往宣大薊州等處亦
即隨管前去。察知地里夷情諳習戰陣許帶家
丁十名。仍與口糧馬匹料草官與廩給○四十
二年議准在京五府新襲公侯伯未經管事年
三十五以下及各爵應襲不拘年齒長幼俱送
京營聽戎政文武大臣定以日期隨管較射。仍
授武經首將傳等書令其熟讀細講。每人仍撥

軍伴十名跟用。先將收管姓名具奏。每歲終巡視京營科道列其勤惰勇怯奏聞。○四十三年題准京營科道會同戎政大臣將隨營勲威每歲較試二次。其弓矢策論習熟者附記在簿。遇有管中參遊坐管缺。照例酌量推補。未諳練者行戎政大臣督責戒飭。○隆慶三年議准戎政大臣及巡視科道每年終將帶俸送管觀操公侯伯從公保舉。以備坐管遊擊之選。三年酌量敘遷。一切禮體悉照管中舊規。不許驕抗紊亂及剝軍占役。○萬曆元年議准。

皇親應襲不必隨營操練

凡操練。洪武六年。定教練軍士律。騎卒必善馳射。及鎗刀。步兵必善弓弩及銃。凡射。十二箭內六箭遠可到。近可中者。為試中。遠可到。將士以一百六十步。軍士以一百二十步。近可中。以五十步。凡射弩。每用十二箭。內五箭遠可到。蹶張以八十步。划車以六十步。凡用鎗。以進退習熟為試中。凡在京衛所。每一衛以五千人為則。內取一千人。令所管指揮千百戶總小旗領赴御前試驗。餘以次輪班。在外都司衛所。每衛五千。內

取一千人。令千百戶總小旗領赴京師。一體驗試。餘以次輪班。其所試軍士。如騎卒騎射便熟。善鎗刀。步軍善弓弩。及鎗者。所管指揮千百戶。總小旗各以其能受賞。不中者降罰。軍士中者受賞。不中者亦給錢六百文。為道里費。指揮所管軍士一千人內。三百人至四百人不中者。住俸四箇月。四百人至五百人不中者。住俸半年。五百人至六百人。不中者。住俸十箇月。六百人至七百人。不中者。住俸一年。七百人以上。不中者。指揮使降同知。同知降僉事。僉事降千百戶。千

戶所管軍士一千人內二百人至四百人不中者住俸半年。四百人至六百人不中者住俸一年。六百人以上不中者降百戶。百戶所管軍士一百人內二十人至四十人不中者住俸半年。四十人至六十人不中者住俸一年。六十人以上不中者降充總旗。總旗所管五十人內二十人以上不中。小旗所管十人內五人以上不中者皆降為軍。在京衛所發廣西南寧柳州守禦。在外衛所北方者發極南煙瘴地方南方者發迤北極邊衛分守禦。各都指揮使司所試軍

士四分以上不中者住俸一年。六分以上不中者都指揮罷職。○十六年。令天下衛所善射者十選其一。於冬月農隙輪班赴京較試。不中者罰其指揮千百戶。中者賞鈔五錠。連中者六錠。中不及者三錠。不中者亦給道里費。各邊軍士就於本衛較射。○成化元年。令大營提督官。每月二次赴團營會操。每年二月十五日上操。五月十五日止。八月十五日上操。十一月十五日止。歇操之日。仍十日一赴教場點視。○弘治十七年。定團營操法。每五日之內。二日走陣。三日

演習武藝○正德八年奏准提督各營坐營准
號頭等官於常操之後俱令在營操練○嘉靖
六年奏准該操之時提督官照常大操三日坐
營官小操二日凡下營布陣不必拘泥古法止
照常用三疊陣及四門方營其武藝易止以弓
箭為長技每營選箭手力手鎗手牌手銃手各
一二人為教師使轉相教習長短相衛其號令
坐營官督各管帶官與眾軍士逐一講解使各
通曉毋徒隨眾呼喊虛應故事○十三年奏准
號頭千把總等官督教一年之上戎政大臣會

同兵部堂上官試驗。教成八分者。會薦陞賞。六分以下者。奏請罰治。○二十九年題准。兵仗局將一應神器。每件書營司隊伍姓名。如遇上操。就令各軍神鎗等手。徑赴該局。照名給領。仍給火藥馬子鉛彈。赴營從實射打。住操之日。送局交收。如有炸破不堪者。告明看驗。交繳另鑄給用。○又議准。神樞神機二管。餘下將官十員。所統兵馬。不足一枝之數。行總協大臣會同巡視科道。將五軍營備兵。再行揀選。交與二管將官十員。每員領三千名。與先次選定將官二十員。

共兵三十枝。用心操練。精勇者作為先鋒。○四十二年議准。通州新舊遊兵二枝。併入京營操練。見在四千三百六十餘名。內止練三千名。設中軍官一員。千總官二員。把總官十二員。分為十二司。每司軍二百五十名。仍付佐擊管束。其餘悉歸備兵營。今併入○四十三年議准。總協大臣。每月以初一。初八。十五。二十三日。合操。其餘二十六日。各營將官分練各兵。總協大臣及巡視科道。不必同在一處。隨意各入一營。較閱賞罰。○又議准。戰兵。車兵。二營火器。春秋兩防行。

工部發出責令軍士常用演放。遇晚收於德勝安定二門庫內。畢日送還該局。○又議准京營家丁俱令歸營操演。仍擇其堪為選鋒者方許給月糧二石。脆弱者漸汰一二。○隆慶元年議准三大營內。弓箭鎗刀火器等藝各擇精熟者立為教師。上等每月加糧六斗。次等者每月加糧三斗。教成全隊給冠帶。充名色把總。一半者給賞銀牌花紅。十數名者姑准附過。全無教練者重責革去。教師名糧把總領二百五十人。千總領五百人。教練有成。即當優薦。聽補中軍號。

頭員缺。十分之五從厚犒賞。十分之三亦准尉過。全無教練。即行住俸。各營將領。但有全營教練者。加以都督僉事。若副將。加以都督同知。若止教一半者。從厚獎賞。三分之一者。照常供職。十分之二者。重加罰治。全無教練者。降初職一級。革任回衛。三年之內。三營補練者。有成效。兵部議請。將總協大臣。請

勅獎諭。仍加恩錄。如無功績。巡視科道參論。兵部酌量教練分數。并議點罰。○又議准。三營各將家丁。挑選六枝。住戎政府傍。聽六副將統領訓

練修理戎政廳東西二空室為總協大臣官署。
常川居住。以便諸將就近稟承。○萬曆十三年
題准。春秋停操。月分舊例分為四班進點。今後
歇操之月。間日止用二營進點。不得仍前分為
四班。往返奔馳。徒滋勞憊。

凡輪操。宣德元年。調河南。山東。大寧。都司。中都
留守司。直隸。淮揚等衛。及宣府軍士。至京操備。
今每歲輪班往來。原額春秋兩班官軍一十六
萬員名。中都四萬一千九百六十員名。河南一
萬四千六百四十九員名。山東三萬二千六百

一員名。大寧七萬七百九十一名。○正統十四年。令外衛輪班京操者。前班三月還。八月到。一班八月還。次年三月到。河南山東北直隸。強令官軍。皆隸前班。○成化十二年。令輪操官軍等。違限一箇月之上者。叅問。其撥補逃故等項。違兩箇月之上者。解人連坐。若軍士一班不到者。罰班六箇月。軍兩班。官一班不到者。發居庸密雲山海關。罰班六箇月。軍三班。官兩班不到者。發大同宣府。邊衛。罰班一年。官三班不到者。發邊衛。罰班一年半。其補班月日。各另扣算。俱先

送法司問罪畢日。免其納鈔杖斷。送回兵部發遣。自首者。止問越關等罪。照例補操。罰班免發邊衛。若見操在逃。一次至三次。應罰操者。比前例遞減一等。前項自首。及該班不到。并承批管解。捏故軍職。俱不必參奏。徑自送問。○弘治元年。令都司衛所。除軍政守城管操。管運外。餘分兩班輪操。五年一代。週而復始。○十一年。題准官軍依期數足。聽兵部行巡撫衙門。將掌印官量加獎勵。若違限及少軍。查例行巡按御史提問。仍監追軍完解。部獲有批。理方許復職。○十

三年奏准輪操官軍逃在京城內外潛住者初
犯打七十再犯打一百送操官旗無力納鈔者
就在原問衙門單衣決打若逃回原衛原籍者
以越關論逃三次者不分革前革後各免決打
納鈔京衛調外衛外衛調遣衛俱帶俸食糧差
操○又今該操官員故行構訟不肯赴操者聽
撫按官起解赴部發操如有抗拒或挾私排陷
者調遣衛帶俸其輪操軍士沿途劫財殺傷人
命占奪車船作踐田禾等項除真犯死罪外徒
罪以上發遣衛充軍其管操官不行鈐束并故

縱者來問調衛○正德六年奏准各處地方災傷六分以上者京操官軍先行放回。五分之一者仍舊存操○嘉靖四年議准官軍上班有兵備去處責成兵備無兵備去處責成該道分巡親臨督併起程。其月糧徵完布政司佐貳官一員帶赴總會便道都司佐貳官一員帶軍回候官軍到彼唱名給散○十年議准今後脫班不到官軍俱自起程之日為始扣除俸糧還官。不許朦朧冒支○十七年議准各處談班官軍若全衛通不赴操及不到七分以上者將親管指

揮千百戶官鎖押選營比較其脫班官軍查照
脫班次數送問完日照依轉發開邊罰班操守
○二十一年題准少軍衛所官員以十分為率
不到二分以上行撫按官提問住俸五分以上
將掌印官提解來京究治八分以上提問降級
調發邊衛領班都司亦以十分為率八分不完
參奏降用其不到官軍自文書到日限一箇月
以裏驗補解營違者巡按御史先將各兵備守
巡查參其各該坐營等官私役賣放兵部及提
督科道訪實參奏○二十三年議准各該衛所

領班官員五百名之上。以指揮領之。一百名之上。千戶領之。不及百名。總小旗領之。○二十九
年題准。凡班軍臨解之時。不行拘集齊足。唱名
交付者。即係各衛所掌印官故縱。各該守巡等
官督責欠嚴。若照數唱名。交付領班。劄付官。都
司管領起程。而復不到營者。即係劄付官領班
都司責放。在京聽巡視京營科道舉劾。參送法
司。在外聽巡按御史參奏提問。照少軍分數。問
擬。○三十年議准。大寧都司兩班官軍六萬餘
名。免其京操。添設將官一十二員。統領前去薊

鎮防禦○三十一年議准山東河南各添註命
事一員專理班務南直隸即以額上僉事兼管
各請

勅行事其僉事會同都司掌印官精選班軍點付
領班都司押領赴京缺少違誤聽兵部撫按及
巡視科道叅劾僉事免其赴京○三十五年議
准鳳陽山東河南不到班軍每名追銀三兩六
錢以備募夫之用行中都山東河南撫按官嚴
行兵備都司督責各衛所掌印官清查原額官
軍督發赴班有逃亡事故即將城操軍餘及衛

所雜差人役暫行撥補。一面行清軍官者實勾
補務足原額。應支月糧及時支給。預支糧銀隨
軍起解。以後少軍衛所掌印官。三分以上問罪
住俸。五分以上問罪降一級。八分以上問罪降
一級。調發別衛都司掌印官。五分以上。參問住
俸。八分以上。一體降級。皆以實在軍數為主。逃
亡者不在數內。如果照數點發齊足。中途不到
者。領班都司并劄付官亦照前都司衛所掌印
官例行。如有受財賣放賊多罪重者。仍照律例
問擬。俱聽戎政衙門參行兵部提解來京究問。

○四十一年議准今後每軍止許存留安家卡
兩箇月。其餘盡數差官解部。委司官督同領班
都司給散。○又議准班軍赴京照例赴部點名。
隨發各營收操。下班之日。亦聽部點放。各營將
官不許擅自收放。差撥役占。凡行糧文冊俱令
該管都司攢造送營給赴戶部關支。內有逃故
查明扣除。○四十四年議准將班軍點完。劄付
解官同赴撫按衙門掛號。即行。不到官軍照例
問擬追銀解部。班滿掣有營批。兵部方給批廻。
○隆慶元年題准發河南山東班軍一萬二千。

名於薊鎮防守修邊○二年議准三都司京操官軍督令隨營操練。仍咨工部并內官監今後遇有重大工程。必須會同兵部并戎政衙門議請酌量撥給。不得徑議撥用○又議准上班官軍責令各兵備與都司掌印官拘各軍正身審係精壯。將真正年貌明白填註造冊四本。五人為伍。設一伍長。五十人為隊。設一隊長。互相覈察。內有年貌不對及一人不到者。同伍及隊長俱以軍法連坐○萬曆元年議准凡班軍缺額領班都司催取名糧與劄付官管領隨軍解部

每糧一分。即准軍一名。通論分數。以行參罰。其缺軍分數。在衛所原少。則照例參究。該都司衛所掌印官。及守巡兵備。若在途在京脫逃。則專參各劄付官。及領班都司。若有司徵解錢糧不前。以致班銀拖欠。聽撫按參奏處治。○又題准改山東河南領班官。為署都指揮僉事。中都領班官。為署副留守。與各司軍政僉書。一體管事。每遇該班內輪一員領軍赴京操備。回日嚴督各衛所掌印官。清查軍伍。○又議准山東濟東兗三府境內衛所官軍。邊操既屬秋班。京操俱

併春班。青登萊三府境內衛所官軍。邊操既屬春班。京操俱併秋班。二十四衛共省劄付官二十四員。又革去押解官二十四員。裁革都司僉書一員。京操劄付官與在衛巡捕官相輪。邊操千把總與在衛管操官相輪。以均勞逸。○八年題准。班軍免其做工。俱令著伍操練。工部將人匠班價等項。著實清查整理。以濟工作之費。免致復用班軍。○九年題准。訓練班軍。山東春秋兩班。分為四營。領班都司二員。河南秋班。仍為一營。領班都司一員。中都春秋兩班。分為八營。

領班留守四員。每營各設中軍一員千總二員。把總六員。上班之日。與同京營坐營官分練。聽六副將統屬。春班正月。秋班七月。上班。隨京營歇操。放回休息。其餘補額軍。二分以上者。紀錄一分者。免究。通無僉補者。附過。軍數減於前班者。兵備留守都司等官。分別參治。

凡選補。成化十九年議准。揀選在京七十七衛官軍。一等者。送團營。二等者。送五軍等營。各操練。○弘治十八年。題准。差郎中一員。會同選軍科道。帶取各衛食糧。并賞賜文冊。清查空閒旗

軍送各營操練○嘉靖十六年議准今後送驗
軍士務要審實正身其年二十以上五十以下
年力精壯者俱送團營操備如二十以下五十
以上精力果備者方許驗入三大營老家各該
衛所官旗敢有故縱冒名代替蒙蔽送驗者審
究得實驗軍主事從重叅究○又令在京七十
八衛所舊七十七衛所
新增真靖所勾解告補軍丁及在逃
自首軍惟蕃牧所牧馬所該所徑收著役餘七
十六衛所俱送驗軍主事審驗。

長陵等八衛專護

陵寢騰驤等四衛專養

御馬監四衛營及二十四外馬房馬匹真靖所專

守本所城垣犧牲所專養祭祀犧牲外其餘驗

係精壯者俱分送十二營操練○三十年議准

行戎政文武大臣會同巡視科道并兵部驗軍

主事清查京營老弱軍士各帶應繼應替精壯

戶丁審驗明白即與摘牌替役○又令在京衛

所逃軍在兵部職方司首補領給印信准令紙

票隨赴兵部武庫司明報掛號查原衛所勾單

未發立案已發行文原籍停止每月終武庫司

手本過職方司查理。如有首補過不報奸軍。及在衛不自速行告補戶丁。或係查訪得出。或被入告發。一體重治。○三十一年議准。行京營文武大臣。挑選精兵四萬。以二萬二千屬五軍營。一萬八千屬神樞神機營。○三十三年議准。兵部委司官一員。會同巡視科道督同副參遊佐等官。審驗各營正備兵。將大小衛分。相兼搭配。務令一衛專隸一營。或多寡不齊。務將一所盡屬一營。精壯者作為正兵。老弱者作為備兵。以後遇有各衛告補。及清解首逃軍役。及營操官

舍聽驗軍主事悉照編定營伍分撥號頭等官查照遵守○三十七年議准驗補新軍清勾故絕俱要細查應補正身方准行查取結各衛所不得扶同驗送如或作弊該管指揮千百戶連坐○四十二年議准劄委司官一員會同巡視科道督率各衛掌印官備將各營正兵及原屬衛所每營每衛各攢造文冊一本營中據冊稽查衛中憑冊支餉後有逃亡事故即行開報在衛即與住糧容隱者送問○又議准召募軍士在營病故或為事住糧者許赴兵部告明病故

者以精壯親餘頂補為事者許其出首復役○
又議准戎政大臣會同巡視科道每營挑選武
藝精強者列為一等秋操口糧增支六斗武藝
生疎膂力尚堪教習者作為二等止支口糧三
斗○四十四年議准行總協大臣將軍兵內除
挽車銃射之外其餘俱選作戰兵仍於城守軍
內擇精壯者共足四枝務使戰兵十枝與車兵
十枝相當○四十五年議准京營城守十一營
中量併神樞第三營之兵分入十營之內共車
戰城守三十營以導

欽定三十營之制。其城守。每營俱限二千名。不足之數。准行清軍衙門勾補。官多兵少。其千把總冗員。行總協巡視等官選別去留。○隆慶元年議准。行各巡按御史。著落清軍官從實勾軍解部。先補戰兵。次及車兵。又次及城守。每營務足三千。○五年議准。行總協戎政大臣查殫忠効義二營舊規。將官舍餘丁從宜收補操軍。○萬曆元年議准。將改

昭陵及掣去守衛者。各營於分屬衛所官舍軍餘內召補。一體收糧入操。○八年題准。三營正兵缺

伍照摘牌事例選補。每月一次。送部覆驗。收糧操練。○九年議准。解到新軍。即時收伍。但有舊軍應役。即係冒頂。責治革退。不得將新軍發回聽繼。以滋奸弊。

凡考閱洪武中令京營士馬之數。按月開報。○景泰三年。令營操軍士有納賄買閒者。御史訪察。兵部委官分行點視。赴操過限三箇月者。軍發邊衛官降三級。終身守邊。○天順八年。差給事中御史各一員。巡察各營上操軍士。○成化三年。令各營官軍糧冊。每三年。兵部委官同科

道官清查。凡軍士有事故者。每季委官查勘。三箇月一開報。操官在逃者。每月類奏。○十九年題准。今後給事中御史點開官軍。照舊明白赴營抽隊摘點。如有不到。追究下落。干礙坐營把總等官。指實參奏。○弘治六年奏准。兵部提督官會同該營總兵官。通將各營號頭。照依軍政事例。從公考選。年力精壯。謀勇可取者。存留管事。老病貪婪。誤事害軍者。黜退差操。另於聽缺并隨伍官員內推補。以後仍五年一次會考。○十一年題准。點開京營科道官。一年一換。不許

別項推委○十七年題准各營號頭把總等官
有將操軍撥送權門私役五名以上降一級二
十名以上降二級若至五十名以上降三級仍
調外衛識字旗軍人役改撥邊衛充軍○正德
六年以春秋初操二次閱視太密奏准每三年
一次兵部奏請舉行○嘉靖元年奏准三年一
次會官考驗團營官軍弓馬武藝察其平昔賢
否分別等第奏請去留○四年令點營科道并
驗軍委官備查團營官軍每營務足一萬之數
今後凡有興作不許擅便奏討坐營號頭把總

等官。仍要加意撫恤。有私自影射及額外役占俱退出原伍差操違犯者。科道官指實參奏從重究治。○二十八年議准。三大營官員除三千營隨

駕執事五軍營內圍子手。神機營內五千下各係上直。其餘把總等官。五軍營三十九員。革一十二員。神機營五十六員。革一十四員。以後坐營官缺。兵部推舉。或將見在別營官員事務簡者量為兼領。其把總官員查照舊例。每軍二百五十名。方設一員。如遇員缺。提督文臣會同該營

提督巡視科道等官選補俱務在得人不必拘泥原額○二十九年題准點視科道仍一年一換復命之日舉劾大小將領仍差兵部司官分投點視○三十一年議准每年防秋畢日聽京營科道將在營將領從實舉劾兵部會同戎政大臣考察去留○四十三年議將京營將領每遇年終科道復命之時戎政大臣會同考閱一次以定臧否兵部官不得干預其正當閱視之年歲終免其重閱○四十四年議准三大營號頭千把總等官不職許總協大臣不時叅革果

有勲修職業者每半年一次開具送部。某人堪任邊方某人堪任本營以憑酌用。巡視科道差滿之日亦要一體保薦。○隆慶三年議准秋操之期戎政大臣及巡視科道將各營官軍家丁師範如法考閱。下等者軍士照常發落家丁師範革糧一石隨操。甚則革除名糧就於上等軍士挨補。以後年分照例考閱。互相陞降。三考上等。改充管隊。五考上等。照邊方効勞年久事例給與冠帶。○四年議准秋操歇日提督大臣會同巡視科道將各副將以下至把總管隊隨伍

等官。大加閱視具奏。○萬曆四年議准。設營千把總員缺。總協大臣。今後查巡視科道疏薦者。酌量題請充補。未經疏薦者。不得濫用。○又議准。今後京營將領。年資果深。與才堪邊鎮者。與邊將相兼推用。或才不宜邊。鎮歷一任至六七年者。聽總協大臣查其才識卓越。操履無虧者。指實具奏。兵部題請加恩。

凡選鋒。嘉靖三十九年。令京營將官有曾任邊方者。每員准家丁二十名。每名月給米二石。仍給犒賞銀五兩。於太僕寺馬價。或本營子粒銀。

內勤支○四十五年。令家丁俱隨營操。仍擇其堪為選鋒者。方月給米二石○萬曆五年題准革去家丁名色。通將各營精壯軍丁選驗改為選鋒。六副將各與三百名。十戰兵營每營增設三百名。車兵十營每營各增二百名。每月給雙糧。各統以把總時常訓練。總協科道不時簡閱○又令添設選鋒把總轉送該營管領操務凡軍伴嘉靖四十三年題准。副將軍伴二十名。參將佐擊坐營一十八名。大號頭十名。中軍千總五名。把總四名。俱班價內給與。不分營官大

小每軍伴一名。每月給銀四錢。○隆慶三年題
准。總督跟伴不過二十四名。書算二名。副將不
過二十名。叅將不得過十八名。號頭不得過十
名。以上各書算一名。中軍千總不得過五名。把
總不得過四名。違者聽總協及巡視官叅奏。多
五名降一級。十名以上降三級。二十名以上罷
職不敘。仍發邊衛充軍。賣放包納。悉准此例。勲
臣應襲難同見任。一體裁革。近年每季於班價
內題請吏給
凡聽征人馬。弘治十四年。令選團營官軍三萬
員名。以將官二員管馬隊。二員管步隊。聽候調

遣○正德十一年。令舉曾經戰陣。謀勇無著。將
官一員。假以副都督名目。公同提督團營大臣。
挑選人馬。如法訓練。以備緩急○又令於團營
內。揀選官軍一萬員名。在東官廳操練○嘉靖
六年。令以叅將二員。統領新選官軍三千員名。
在東官廳操練。總兵官一員。調度○三十八年。
題准。行巡視京營科道會同提督。聽征等官。將
營軍簡選精銳強壯。以備出戰。在十二團營者。
選作八陣。以四陣為正兵。四陣為奇兵。專備緊
急。防衛京城。在東西二官廳者。分作十二枝。六

枝出征六枝休息更番節力○三十年議准聽
征軍士分為三等食糧有差督力過人騎射精
熟者為上等月糧外加米五斗年力強壯技藝
通曉者為中等月糧外加米三斗三等者照常
米一石○又議准出征在逃臨陣退縮者俱送
刑部查照律例問擬應瞭哨者編發宣府獨石
等處沿邊瞭哨再犯及因而失誤軍機者俱擬
死罪仍查一伍中逃至二人一堡中逃至五人
以上千把總官不行檢舉通行連坐○三十七
年題准聽征官軍三萬五千員名防秋三箇月

每員名行糧每月四斗五升○又議准三大營聽征官軍有逃故者就於本營取補如本營無精壯者取之各衛餘丁及解到新軍不許隔營充調以滋影射致使錢糧馬匹難以稽查○三十九年議准三大營官軍揀選精壯者五軍營十二枝神樞營神機營各四枝每枝三千員名共六萬餘名俱免做工聽候調遣每枝用中軍官一員千總二員把總十二員軍有年老者聽以精壯兒男摘牌收伍先行該衛取結○四十二年議准京營不宜遠調外出今後有警以車

營兵十枝。分布東西便門。去城各一二里。其城之東西南北。各屯戰兵一枝。緊在關廂之外。餘下戰兵二枝。隨戎政二臣。駐適中去處。外壯車營聲勢。內助都城防守。○又題准。一等官軍一萬八千員名。照舊每名月支口糧六斗。車兵三萬員名。總協巡視科道隨征官軍一千六百員名。月支三斗。守城四萬二千一百十四員名。月支一斗。○萬曆二年。議准行總協大臣防秋之時。將三大營戰車二兵。各調撥一枝。就令本管將官統領。赴薊鎮軍門。聽派相應處所屯駐。遇

有虜變與邊兵併力截殺事竣撤回○九年議
准將京營輪流出防剴鎮車戰兵二枝每歲秋
防俱暫停止聽在京訓練

凡行軍號令永樂十二年令凡交鋒之際突入
賊陣透出其背殺敗賊衆者敢勇入陣斬將奪
旗者本隊已敗賊衆別隊勝負未決而能救援
克敵者受命能任其事出奇破賊成功者皆爲
奇功齊力進前首先敗賊者前隊交鋒未決後
隊向前殺敗賊衆者皆爲頭功○凡建立奇功
頭功者其親管頭目即爲報知妄報者治以重

罪。行營及下營之時。擒獲奸細者。陞賞准頭功。哨馬生擒虜賊一人者。賞銀三十兩。斬首一級者。二十兩。○凡行營之時。遇有鞍馬衣服器械不同者。衣甲器械相同。而喝問答號不同者。皆即擒之。來降虜賊。所携人口財畜。分毫不許侵犯。即時來報。○凡與賊對陣。須齊力殺賊。不許聚為一處。掣拽空缺。如力不能支。不能決勝。無勇無謀。及不盡力殺賊者。全伍皆斬。○凡隊伍已定。不許馬軍入步隊。步軍入馬隊。違者重罪。如臨陣混戰。失其本隊。插入別隊者。不拘。○凡

殺敗虜賊。須盡力進勦。不許搶掠人畜財物。違者重罪。如所乘馬困乏。許以所擒賊馬換乘。○凡對敵之際。一隊遞看一隊。有不齊力前進者。戰勝之後。許連隊之人首告。治以重罪。容情不首者罪同。○凡管軍頭目。須愛恤軍士。軍士聽令。不許怠慢。如伍中有一人不在。小旗報總旗。總旗報百戶。以次報至總兵官。總兵官奏知。從征官軍。有在逃者。斬。該管頭目不報者重罪。○凡軍士須人馬相應。不許以軟弱不堪者。拌入隊伍。如人壯馬弱。或馬壯人弱者。許弱者以馬

與壯者。若自己已有馬。臨戰之際。能借與驍勇者。殺賊有功。許借馬人分賞。不願分者聽。其戰馬臨敵許騎。無事騎者治罪。各營馬驢須愛恤。馱載。該管官時常點閱。有故違及將軍器拋失。或盜賣者。俱重罪。○凡軍士行糧。該管官旗時行點閱。有過用及遺棄者。并該管頭目皆斬。○凡軍行及下營之時。須各認隊伍。不許擅離。及雜入別營別隊。違者併該管頭目俱重罪。○凡夜行相遇。即喝問。有答號不得者。擒送辯驗。果是奸細。照例陞賞。故不答號及見而不擒者。事覺

俱治以重罪○凡軍中遇夜以各樣大小銅角
笛聲為號不許聲音相同各聽號聲識認隊伍
不許叫營違者論罪但夜間有喧譁者即問所
起之處及左右應聲之人與該管頭目皆治以
重罪○凡行營須待大營旗纛起行或聽

駕前銅角聲各營方許起行每日下營量撥步軍
或五隊十隊馬軍五隊或三四隊步軍披甲馬
軍不摘鞍伺候長圍及架砲者布列已定方許
入營休息有盜人衣糧諸物及盜驅馬宰殺并
檢括隱藏人遺失物者俱斬知情實首者給賞

知而不首者同罪。若收得馬驢羸樛者。即送該軍轉送大營。召人識認。如有遺失。被後哨官軍收獲者。收後官治以重罪。○凡各營有失火者。即是與賊遞送消息。并該管頭目。俱重罪。其每日行營。不許在途炊飯。違者并本管頭目。皆斬。下營掘井。必令人監守。不許作踐。及占蔽自用。○凡軍中有病者。管隊官旗。即令醫療。掌藥料官及醫士。常加巡視。不許勒取財物。違者重罪。○凡長圍。及坐冷者。須晝夜關防。各營架炮者。務依方瞭望。有灰塵揚起。人馬往來。若聞哨馬

營及四面砲響。即時傳報。其管事官遇有事。隨
即飛報。不許頃刻遲慢。○凡掠陣官臨敵時。視
有畏避退後者。即斬之。紀功。遇有有功者。即
紀之。有過者。即錄之。以憑賞罰。○凡臨陣。令內
官持象牙牌。視有勇敢當先殺賊。能立奇功。頭
功者。即與牙牌收執。徑赴大營。給與勘合。以憑
陞賞。○凡軍中有妄談災異及妖言。或漏泄軍
機者。皆斬。知情不首者。罪同。首實者。重賞。○凡
見鹿及野馬黃羊諸物。驚走突入營伍。及望見
塵起。及旋風揚沙。野獸騰踏。及見死馬牛羊。與

牛羊駝馬遺穢踪跡或拾得一應物件若男女衣服首飾并文字等項不論久近隨即報知○凡軍行在道不許圍獵或遠望似馬非馬似鹿非鹿似人非人白日見煙入夜見火不論是非即報○凡功次務須實報有虛誑者重罪所報實者給與勘合無勘合者不准陞賞○凡號令總兵官告都指揮都指揮告指揮指揮告千戶千戶告百戶百戶告總旗總旗告小旗小旗告軍士務令遵守○正統十四年令每隊伍中立公正掌令官二人務令頭目軍士死生相顧臨

陣有進無退。若頭目不顧軍士。先自退怯者。掌
令官即斬其首。別選頭目代之。若軍士不顧頭
目。先自退怯者。許後隊斬前隊。准常功陞賞。軍
士不勇不進致頭目失陷者。斬其全隊。頭目不
勇不進致軍士失陷十人者。斬首。至二十人者
斬首。不與承襲。至三十人。及全隊者。斬首籍沒
其家。凡軍士頭目應斬而有奇功者。量與贖免。
其總兵官申令不明不嚴致一隊退怯者。罰俸
一年。至三十隊者降二級。至五十隊以上者罷
職。全軍退怯者斬。但降敵者全家斬首籍沒財

產行軍之際有敢搶擄民財至十貫以上者斬
首示衆頭目縱容軍士搶擄至十人者該職充
軍二十人以上至全隊者梟首營門軍士並皆
處死軍中及召募新來之人不知軍法敢有造
言惑亂人心阻撓號令致壞事機者凌遲處死
籍沒其家臨陣在逃及不聽總兵號令者斬○
成化元年令總兵官出師臨敵軍士有違犯號
令者聽以軍法從事尋常出哨等項不許○弘
治十三年奏准凡官軍遇有征調點選已定避
難在逃者依律問斷若征期已過發宣府獨石

等處沿邊哨瞭半年滿日回衛。若仍發出征及
哨瞭而復逃者。依從征私逃再犯者律處絞。
凡優處官軍。嘉靖三十六年題准。五城兵馬司
凡遇在京各衙門詞訟。係干營操官軍。除人命
強盜重情外。其餘小事輕犯。或干證應審。俱要
具申該營散拘審問。早為發落。毋得輕易監禁。
致妨差操。違者聽兵部及戎政大臣叅究。○四
十二年題准。五城及在外附近府州縣。以後京
營官軍正身免其民差。戶下餘丁。照丁派差。如
犯人命強盜重情。及戶婚田土。正犯應該對理。

者一面提問。一面行營轉行戶部暫扣月糧聽候發落。若止因牽告干證不許一槩監禁○又議准京營將官有犯奸賊各該衙門會同戎政衙門查究明白方許舉提○四十二年題准京營軍士刁潑成風藐視將領校帖訐告甚至兵馬司輒行拘執弓兵番子凌虐百端今後軍士敢有仍蹈前非者拏問重究將領貪婪失職戎政大臣巡視科道不時論劾不得輕准軍士告詞有傷大體○萬曆三年題准京營號頭指揮等官但有干連官軍及承告軍官不公不法等

事須要密切實封奏聞不許擅自勾問其軍職并土官有犯強盜人命等項真犯死罪者先行該管衙門拘繫備由奏提

凡犒賞將士嘉靖三十二年令各邊將官見在京營者每月給米五石養贍家口在京軍官不許混支○又奏准戶部徵收京營草場子粒銀兩共一萬三千五百兩有零今後每年徵解兵部貯庫按季聽戎政大臣印信手本到部關支前去賞軍等用按季將收放數目填造文冊一様二本一送兵部一送科道查考○四十三年

議准。邊方調赴京營管領家丁千總等官許於節年官軍逃故扣除糧內月支米三石。戰馬料草於扣省料內支給。○隆慶二年題准。戎政大臣將營中各項銀兩仍入庫收貯。就於營操官內選擇廉幹者一人專司其事。凡遇犒賞公費量數給發。其椿朋銀兩依期呈報戎政衙門貯庫。季終差官類解太僕寺庫。仍置文簿付本官收掌。逐一登記錢糧。如有侵漁聽巡視科道不時參論。○五年題准。營中子粒銀兩俱要責令該管官員赴巡視科道官掛號方許支用。有那

借隱匿者。聽科道官參究。

凡營馬查點。宣德九年。

命兵部官同御史給事中點視征操馬匹。借點及借與者共追馬一匹。馬無見在。及隱瞞不報者。查追。仍勘其冒支草料。加倍追納。○嘉靖元年題。准。拐馬在逃官軍。俱限一月。以裏出首。免其送問。發營差操。如限外出首。及被挨拏到官。俱送法司問罪。初犯再犯。及原拐馬見在者。俱照舊責打發落。官免降級。若三次以上。及原拐馬或餓死。或變賣者。不分官軍。俱照舊例。京衛調外。

衛外衛調邊衛追馬完日官降一級。於見調衛所帶俸差操不許管軍管事。事故之日子孫聽回原衛襲替祖職。若官軍偶因馬匹病死。權追椿銀。及隻身患病無人告官者。勘實照常發落。○十三年題准團營馬匹。令兵部差官會同稽道通查三天。管貧軍所領之馬。一一交與得過管軍領養。除上廐中廐聽其自養外。其無廐之馬。行點軍科道等官揀出。留家調養。一兩月後驗有廐者。免其會餽。仍嚴禁餽槽。若被兩鄰告發。或在營驗出。皆送法司問罪。○三十年議准。

令太僕寺少卿每月三次赴教場點驗各營馬匹。分別三等。上廐中廐者聽令領養。無廐馬匹責治本軍。其副參佐擊坐營號頭把總等官務要嚴督各軍。禁革剋削草料雇借騎馱等弊。年終照例以百匹為率。倒失十匹以上者該管官送問。七匹以上者罰治。全無倒失者量加犒賞。其椿朋銀兩照例按季造冊送部查算明白。用印鈐記轉送戶部臨倉扣糧。○萬曆三年題准太僕寺調取寄養馬轉行提督京管馬政少卿會同兵部委官公同兌給缺馬官軍領騎完自

將兌給過馬匹毛齒官軍姓名造冊呈部查考。仍行總督大臣查照原議。每年終行令各營將領備查缺馬數目。造冊送部。以憑行寺補給。永為定例。○四年題准。每上半年於住操之時看驗一次。下半年於印烙之時照舊規稽查。通行部寺科道各官會同五軍巡捕等各營馬匹通行檢驗一次。瘠損者懲治。老弱者變賣。屢懲不悛者轉兌別軍。本軍從重究治。以示懲戒。該寺仍將驗烙過各項馬匹數目造冊奏繳。青冊送部查考。

凡營馬草料嘉靖七年議准京營將官本身暨
征馬匹按月關支料草各一分○十三年題准
團營馬匹

勅令戶部將存操馬匹再添三箇月草下場馬匹
再添六箇月料三箇月草通融放給以發一年
之用○二十一年題准將二官廳并十二營馬
匹除冬春料草本折照舊關支外其夏秋料草
原議本折關支內折色每石量增銀五分共銀
三錢草束除本色照舊關支外其餘該支折色
之月量增銀五分共銀三錢按月關給

將軍營

錦衣衛侍衛將軍自為一營。遇下班之日。照例操練。從管領侍衛官提督。其例具後。

計開見在營官勇士

坐營指揮四員

勇士五千四百三名

凡大漢將軍選補。弘治四年奏准。錦衣衛大漢將軍務勾一千五百名。若缺五十名。方許開申選補。其將軍務要身長五尺三寸以上。力勝三百五十斤。及無惡疾。體氣過犯。不係正軍。及犯

極刑之家方許收用○近例將軍有缺錦衣衛
堂上官會同科道官并管領將軍官選補○又
例大漢將軍官旗五年一次兵部錦衣衛堂上
官各一員會同兵科都給事中并管領將軍官
揀選去留內千百戶有缺就行照例推補大漢
將軍有缺除將先年選定者挨補外如隨伍將
軍有體貌魁偉特出衆人之上得超補見缺
凡將軍替補嘉靖三年議准將軍上直侍衛年
深授有官職者事故之日許令嫡親兒男查照
舊例繼補其餘將軍事故止許收充校尉一輩

不許將房族人等收補○二十四年題准選退將軍兒男查係應役十年以上者許充校尉不及年分者止與力士著為定規○二十七年題准選退將軍兒男改充力士者照校尉例止許補當一輩○萬曆二年題准錦衣衛將軍千百戶侍衛三十年以上者兒男許替冠帶總旗將軍侍衛二十年以上者許替校尉二十年以下者止與力士俱止唯一輩其應役三年五年照舊查革永行遵守

凡將軍清查嘉靖九年令兵部錦衣衛堂上官

各一員會同兵科都給事中清查見役將軍。若有虛冒買閒等弊具奏處治。

凡將軍在逃。正德七年奏准在逃三箇月以裏不曾拐馬許其首復。拐馬者調衛。若過限外。不許首復原役。

四衛營

騰驤左等四衛勇士軍人。餘丁別為一營。從御馬監官提督操練。其坐營等官並於四衛指揮等官推選。其初以處迤北回還者。後多以買馬投役。弘治末年奉命清查。冒濫頓減。正德間漸

增至一萬五千。嘉靖初特定額數為五千四百
三名。除隨

駕樞列。例用五千三百三十名。其餘以備逃亡事
故之數。後該監累乞收補。不允。命仍照初例。如
數補足原額。不許違

旨奏擾。至今遵守云

計開見在官軍

坐營指揮四員

官舍旗軍六千五百四十九員名

凡軍士收補。宣德九年。令凡逃亡。走回軍餘民

人俱收充御馬監勇士○成化年間令兵部秀官一員驗軍食糧凡在京各監局并四衛勇士軍人俱要審驗著實方許食糧○十九年令騰驤四衛軍士戶絕例不清勾若戶丁告補者查無詐冒方許收役

凡軍士清查弘治十八年令兵部侍郎會同科道官清查四衛軍士今後遇有進充及補役復役俱有兵部審勘驗發方許收糧如有作弊本身并該管官旗問調南方極邊衛分○正德十六年

詔四衛勇士除弘治十八年經兵部科道清查覓役正數并事故外其餘詭名冒籍未經裁革仍又黃緣回衛虛掛名額者各照原擬軍發原衛民丁發在京缺軍衛分各充軍役食糧差操以後勇士替補照例開送兵部委官處驗過方許收糧○嘉靖八年奏准清查過四衛勇士備行該監并騰驤左等四衛將應存留者照舊食糧差操內有年老無子身終之日即與開除名伍應候缺者如遇事故缺伍除迤北回還親生子除勘無違礙徑令替補外其餘進充勇士缺至

十人之上。該衛即申兵部知會。先儘見故子孫
方許將候缺人役。開送兵部驗軍主事。從實揀
選年力精壯者。照名充補。俱止終本身。如候缺
人役。充補已盡。又有事故缺伍。仍照前例再行
揀選收用。其應該革退。若願投軍者。行委驗軍
主事。驗係壯丁。查發缺軍衛所充軍。仍送神機
三千五軍等營操備。○又議准。騰驤左等四衛
官旗勇士軍人。行點軍科道官照例點開。○三
十年議准。將四衛營軍士通行查勘。有影射占
役者。盡數退出。赴營操備。詭名冒糧者。悉行裁

革有馬軍人倒失馬匹。照三大營軍士一體追納椿朋銀兩。○四十三年議准行御馬監太監將應操軍士如法訓練。果有成效。聽兵部將原缺人役陸續驗補。椿朋于粒錢糧仍聽科道查理。○隆慶元年題准。騰驤等四衛勇士查照嘉靖八年事例請。

勅兵部侍郎會同御馬監巡視京營科道逐一清查。不許詭名頂替。虛糜糧食。○萬曆二年議准各營見操軍勇務令一一著伍。影射者聽巡視科道參究。

凡軍士撥役嘉靖八年奏准御馬監役使軍伴
勇士掌印太監撥與五十名內勇士十名軍伴
四十名坐營太監每員三十名內勇士六名軍
伴二十四名僉書太監每員十八名內勇士四
名軍伴十四名左右少監每員十二名內勇士
三名軍伴九名左右監丞每員十名內勇士二
名軍伴八名坐營都指揮每員止軍伴十名典
簿并不僉書太監每員軍伴六名不僉書左右
少監并把總指揮每員軍伴五名不僉書左右
監丞每員軍伴四名掌司房長隨內使每員軍

伴三名。內官長隨內使奉御每員軍伴二名。長隨內使并管隊官軍伴一名。前項勇士軍伴俱行兵部驗軍主事查照議定名數。就行騰驤左等四衛撥與應用。

凡營官推補。嘉靖四十三年議准行御馬監太監將四衛管中軍坐營等官從公推舉。○萬曆二年議准勇士四衛二營各裁坐營官二員止。選留二員令其統領開操。除直宿外餘日著實訓練。○三年題准四衛管坐營官缺推補原屬兵部於四衛指揮等官內選用。其御馬監官止。

提督操練不得干預止聽其開具相應官員送
部查訪疏請如或不堪聽於京營大號頭中軍
千總及京衛掌印官內另選廉幹官照缺推補

大明會典卷之一百三十四

大明會典卷之一百三十五

兵部十八

大閱

古者大閱以講武事。蓋安不忘危之意。

國初

車駕親征。則隨地閱武。宣德正統間。或閱於近郊。於西苑。然不著令。隆慶三年。因輔臣建議。於三大營教場舉行。萬曆九年。

上親大閱。一如隆慶中故事。今具列焉。

隆慶二年。題准營兵驕惰。宜設法訓練。自隆慶三年為始。於冬季農隙之候。恭請

聖駕親臨閱視。甄別將官。考校軍士。以為黜陟賞罰。
○又題准

聖駕閱武之日。三大營官軍俱先期在營拱候。內選
有馬戰兵二千名。委官四員分領前導後隨。候
入教場。仍以次各入營伍。其守門擺隊官軍。於
城守備兵巡捕并錦衣衛鎮撫司軍撥用。仍先
請

命文武大臣總理提督各該守門內外官軍。每門添
差京堂一員。錦衣衛千百戶一員。廢棄將官一
監守。至日。三大營馬步官軍除城守圍宿外。

其餘戰兵十枝。車兵十枝。照常演陣畢。請

旨閱射。公侯駙馬伯。錦衣衛官。及副參遊佐。坐營。頭中軍千總等官。俱於

御前較閱馬步箭。馬上人各三箭。步下人各六箭。其鎗刀火器各量取一隊試驗。其把總以下。及家丁軍人射箭等項。令府部大臣四員。於神樞神機各廳分投校閱。差御史四員。兵部司官四員。公同監箭。次日各官將校閱過等第具奏。○又題准閱視以箭數分賞罰。職官一等內有馬中三箭。步中六箭者。先賞十兩銀牌一面。紵絲二

正。折銀五兩。若平昔無過。曾經薦揚者。仍附記在簿。特加超擢。馬中三箭。步中四箭。五箭者。先賞五兩銀牌一面。色段二疋。折銀三兩。若平昔無過者。亦附記錄用。若平昔官箴有玷。謀勇無取。止是厚賞。如係公侯伯。在超擢錄用之例。除賞賚外。遇有兩京坐府員缺。依次擢用。若止是馬步二箭。至三箭者。賞三兩銀牌一面。色紗一疋。折銀一兩。馬中二箭。步中一箭者。賞一兩五錢銀牌一面。或馬中而步不中。或步中而馬不中者。姑准策勵供職。若馬箭不中。而步下中三

四箭以上者量賞一兩銀牌一而馬步俱不中者係公侯伯罰住祿米三箇月。係錦衣衛并各衛願射官各罰俸三箇月。係營中將領罰俸半年。若平昔有過者係京衛革任隨營操備係外衛革任回衛差操。其軍士中有能馬中三箭步中六箭者賞銀一兩。紅布三疋。折銀一兩。馬中三箭步中五箭四箭者賞銀一兩。紅布一疋。折銀三錢。馬步俱中二箭至三箭者賞銀一兩。馬中二箭三箭步中一箭者賞銀四錢。或馬中而步不中或步中而馬不中者姑免責治。若馬箭

不中。而步下中三四箭以上者。仍賞銀四錢。爲步俱不中者。照例決打。若係教師家丁。仍準支月糧一石。舞刀鎗鈎鏢。上等賞銀三錢。紅布一疋。折銀三錢。次等賞銀二錢。三等免其責治。四等照例決打。次日。總協戎政官率將佐等官各具朝服。上表謝。

恩。文武百官具朝服侍班。行稱賀禮。次日。

上御皇極門。賜勅。總督戎政捧至綵輿。將士導引至教場開讀。即日賞資將士。并戒罰有差。

武舉

武舉之法。試其謀畧藝能。列其等第而推用之。
累朝選試。陞用法各不同。具列於後。

天順八年。令天下文武衙門。各詢訪所屬官員。
軍民人等。有通曉兵法。謀勇出衆者。從公保舉。
從巡撫巡按會同三司官考試。直隸從巡按御
史考試。中者。禮送兵部。會同總兵官於帥府內。
試策畧教場內。試弓馬。答策二問。騎中四套步
中二矢以上者。為中式。官量加署職二級。旗舍
餘丁。授所鎮撫民。授各衛試經歷。俱月支米三
石。若答策二問。騎中二矢。步中一矢以上者。次

之。官量加署職一級。旗舍餘丁授冠帶總旗。民
授各衛試知事。俱月支米二石。並送京營量用
把總管隊聽調。有功照例陞賞。○弘治六年定
武舉試策二道。文理優韜畧熟。及射中式者。陞
二級。文不甚優。射雖偶中。止陞一級。雖善行。不
射不中式。及射雖合式。策不佳者。俱暫黜。以候
再試。中者送團營。或分送各邊。俱贍養。或把總
或守備城堡。免令管隊。後每六年九月一次考
試。軍衛有司。果有才堪應舉者。聽於應試之期。
禮送赴部。考退生員。并曾經問斷。行止有虧者。

不許。凡再試不中者發回原籍候本等職役。後
又令先策畧後弓馬。如策不佳。即不許騎射。或
答策雖佳。不能騎射者。亦黜。後又令中式舉人
添支月米。遇陞用之日。即與住支。○十七年奏
准。武舉三年一次舉行。一日答策。次日射箭。考
試策畧弓馬俱畢。中式者照例擬陞。仍將中試
姓名。做文舉事例。出榜賜宴。俱送國營聽用。願
回原籍者。許撫按官推選軍政。○正德三年奏
准。武舉開科之年。預行兩京并十三省各衙門。
曉諭各色人等。如有究極韜畧精通武藝身家。

無礙者。許各赴所在官司投報。俱從撫按官公同三司官考試。起送赴部。○嘉靖元年議准。武舉官生。兩京武學於兵部月考優等選取。在外聽巡按御史考試選取。每遇開科之期。兵部堂上官并提督京營總兵官。統領大綱。兵部屬官分理衆務。初場較騎射。二場較步射。俱於京營將臺前。三場試策。二道論一道。於文場內。先期請

命翰林官二員為考試官。給事中并部屬官四員為同考試官。監察御史二員為監試官。其答策有

能洞識韜畧作論有能精通義理衆以弓馬俱優者中式其策論雖優而弓馬不及或弓馬偏長而策論不通俱發回候開科再考中式官生照文舉事例。裨名賜宴仍俱陞署職二級月支米三石。指揮以上斟酌推用。署千戶百戶鎮撫總旗俱送各邊總兵等官處贊畫及守堡聽調殺賊應得俸糧并加添米石俱於原衛所支給。獲有軍功照例加陞。五年無功者發回○六年題准各邊總兵將贊畫武舉人員量材發定衛所。照依在邊各官隨營供職。撫按官不時查考。

如有掛名不到及攘買功次等弊。指實參奏。八年題准。取中武舉官生。各照陞授職事。俱月支米三石。內有應襲舍人。候襲替之日。照例加陞。通送團營將臺下寄操。指揮於本衛都指揮在京者。於本衛。在外者。於本都司。各帶俸。俱候推用。千戶以下。照例分送各邊聽撫按衙門委用。應得俸糧。并加添米石。俱於原衛所。并今駐衛所支給。指揮等官。一時推用未及。若有願回原籍者。咨送撫按官處。照依品秩委用。千戶以下。除能立軍功陞級外。其間果有才能出衆。曾

於所在地方贊謀効力者不拘有無軍功聽撫按官指實薦舉五年滿日兵部酌量奏請千戶量加署指揮職銜百戶以下量加署千戶職銜令把總備邊守口掌印僉書若能建立奇功一體超用其贊畫官員五年滿日兵部審驗才力有用再發各邊贊畫五年通前十年之上再無軍功又無薦舉兵部再驗其才委無可取及年老殘疾即將所加米石停止其武舉所加署職非有軍功雖遇

恩例不得實授加添月米日後陞職所得俸未過於

所加三石之數。即將所加米石住支。止支本等俸給。前項官員若有犯該革任帶俸閒住者。不論官職崇卑。但係武舉。加陞俸米。俱行停革。永不推用。應襲舍人。照例施行。○十四年議准。武舉千戶以下。不願贅畫者。查原籍原衛。如係邊方。兵部即咨各該撫鎮等官。酌量差委推用。其腹裏地方。行撫按衙門。兩京地方。悉聽兵部。及行南京兵部。各量材委用。以後雖無軍功。但積有年勞。累經薦舉者。與指揮以上。一體推用。若十年以上。未著賢勞。亦無薦舉。及審年力。雖有

不堪原非犯該革任帶俸閒住人員各該衛所
開報前來其原加米石臨時議處○十七年令
武舉定於秋行以後開科俱於九月行事○二
十二年議准武舉開設務求真才取人不必拘
定名數仍照會試南北卷事例分別遠方腹裏
以薊鎮昌平遼東萬全宣府大同山西陝西延
綏甘肅寧夏雲南貴州為遠方以兩京京衛南
直隸浙江江西福建山東河南湖廣廣東廣西
四川河間順德大名廣平真定保定為腹裏如
每科五十名遠方取三十名腹裏取二十名○

二十六年題准武舉中式人員其在腹裏若有
才堪邊用願立邊功者起送兵部再行考驗革
去贅畫名色分送九邊總兵叅將委領管軍殺
賊○三十二年議准三次鄉試中式武舉官生
查照文舉會試事例免其再試徑許赴京會試
○隆慶二年議准武舉中式者分邊腹二項以
後邊方有缺即先推邊方第一人腹裏有缺即
先推腹裏第一人各挨次推用一如文舉挨次
法○四年議准凡天下軍民人等力勝五百斤
或四百斤三百斤以上及武藝超衆者府州縣

呈送撫按嚴加考校。如果藝勇不凡。量給衣巾。充為武生。開科年分。除精通論策者聽隨武舉入場。其餘候場事畢日。撫按復行驗中。行該府給文到部。會試之年。照例於武舉場畢。將各送到選中之人。公同監試。御史通行考驗。不中者發回肄業。中者為首一人。量給冠帶。隨宜委用。餘俱分發薊鎮。其力舉五百斤者。留京為教師。食糧練軍。三年有成就。量陞職級。○萬曆二年議准。錦衣衛及各衛武舉千百戶等官。年深未經咨送效用者。俱送京營委用。限以三年。再無

薦舉即將武舉未石照例住支。係世官者止支本等俸糧。係旗軍舍餘即令閒住。○五年令御史監試武舉。嚴加巡察。有違犯者照文舉例行。

舉用將材

凡武官奉

旨陞任者。或一級。或二級。即遵

旨照級授官。屬武選司掌行。若謀勇出衆。累經薦舉者。難拘資格。即不次超遷。或曰量陞。曰署。曰以某官行事。曰奉

依。皆屬職方司。故有舉用將材之例。

宣德五年。令天下都司衛所。於所屬官及行伍內。每歲選智勇廉能者一人。送京試用。○成化八年。令文武官員軍民人等。有諳曉兵法。謀勇過人。弓馬熟閒者。並許保舉。試中者。無官授以冠帶。有官仍舊職。撥團營操練。聽調。遠方舉者。就各邊操備。其有才無文。武堪為大將。耻於自進者。府部都察院通政司大理寺科道。并在外衙門。各舉所知。○嘉靖六年。令於各邊空間都督都指揮。及副參遊擊等官內。舉保曾經戰陣。謀勇可觀者。行取聽用。○七年。奏准。兩京堂上。

官弁科道及在外方面官員如有指揮以上等官曾經領兵效勞者不拘見任閒住從公舉保○二十一年議准將官犯罪除犯有賊私永不敘用外若是地方失事重者擬死其次充軍其次為民其次革職閒住其次於實職上降級其次於流官上降級如總兵降副總兵副總兵降參將守備果有後效仍以次陞用此外如有謀勇異等沈淪行伍者許各該總督撫按官一體薦舉試驗果實破格收用○二十二年議准腹裏官軍曾經薦舉有願赴邊方立功者本處巡

撫官咨送軍門試用○二十八年題准行六科
十三道及巡視京營科道總督巡撫巡關等官
博訪不拘軍民職官山林草野武舉會舉見任
革任及有過廢棄人員但有諳曉韜畧熟閒弓
馬膂力過人謀猷出衆者不拘名數各舉所知
開列上陳以次酌用○隆慶二年

詔各邊將領等官有素著謀勇累立戰功偶因失
事革職閒住及充軍等項年力未衰猶堪任使
者撫按科道官查訪疏名奏請定奪○萬曆元
年議准在京四品以上及科道官在外總督鎮

巡等官各延訪不拘見任隱逸及被論聽勸革
棄等項人員。上自總兵。下至卒伍民庶。某可為
大將。某可為偏裨。某可備先鋒。及遠使外夷。據
實開註。每人或舉一二員名。或三五員名具奏。
兵部再加品階。並將舉主職名題覆附簿。聽備
緩急推用。如樹有功績。賞及舉主。或徇私濫舉。
以致債事。舉主一體議罰。○十三年。令各處武
職有勇畧出衆。廉潔愛士者。各督撫官加意詢
訪。不時咨部。備查奏保。酌量推用。先儘指揮。次
及千百戶。鎮撫。以及近科武舉。

大明會典卷之一百三十五